



GRAD TUZLA

Na osnovu tačke VI Pravilnika o utvrđivanju uslova, kriterija i postupka dodjele nepovratnih sredstava za novčanu podršku privrednim subjektima na području Grada Tuzla („Službeni glasnik Grada Tuzla“, broj: 2/19 i 8/21), tačke 9. Programa utroška sredstava iz Budžeta Grada Tuzle za 2022. godinu namjenjenih za aktivnu politiku zapošljavanja po Projektu “Zapošljavanje ranjivih kategorija”, broj: 04/11-A-014264-2022, od 25.08.2022. godine, Služba za ekonomski razvoj, poduzetništvo i poljoprivredu Grada Tuzle, dana 29.08.2022. godine, objavljuje:

JAVNI POZIV

za dodjelu sredstava za podršku samostalnim djelatnostima i privrednim društvima registrovanim na području grada Tuzle u zapošljavanju ranjivih kategorija u 2022. godini

I - Predmet Javnog poziva

Ovim Javnim pozivom prikupljaju se aplikacije (prijave) samostalnih djelatnosti i privrednih društava registrovanih na području grada Tuzle koji u 2022. godini upošljavaju nezaposlene osobe iz Tuzle, koje se nalaze ili su se nalazile u momentu prijema u radni odnos na evidenciji Biroa za zapošljavanje Tuzla, a koje pripadaju nekoj od ranjivih kategorija građana definisanih tačkom 3. Programa utroška sredstava iz Budžeta Grada Tuzle za 2022. godinu namjenjenih za aktivnu politiku zapošljavanja po Projektu “Zapošljavanje ranjivih kategorija”, broj: 04/11-A-014264-2022, od 25.08.2022. godine.

Ranjivim i teže zapošljivim osobama, u smislu prethodno navedenog Programa i ovog Javnog poziva, smatraju se: osobe sa invaliditetom u procentu 60% i više, pripadnici manjinskih grupa (Romi), osobe starije od 18 godina koje su bile pod institucionalnom skrbi JU Dom za nezbrinutu djecu ili SOS dječijeg sela, žene žrtve nasilja u porodici, mlade osobe dobi od 18 do 35 godina starosti i osobe starije od 55 godina.

II – Iznos novčane podrške

- Za raspodjelu putem ovog Javnog poziva raspoloživa su sredstava u Budžetu Grada Tuzle za 2022. godinu, u iznosu od 40.000,00 KM, na poziciji “Grant za aktivnu politiku zapošljavanja”.
- Novčana podrška putem ovog Javnog poziva može se ostvariti za upošljavanje samo jedne osobe iz kategorije građana navedenih u tački I. ovog Javnog poziva.
- Novčana podrška po jednoj zaposlenoj osobi iznosi 3.000,00 KM, a namjenjena je za refundiranje troškova obaveznih doprinosa za PiO i zdravstveno osiguranje i osiguranje od nezaposlenosti za jednu osobu uposlenu uz podršku ostvarenu putem ovog Javnog poziva.

III - Pravo učešća

Pravo učešća u ovom Javnom pozivu imaju privredna društva i samostalne djelatnosti registrovani na području grada Tuzle, koji su u 2022. godini zaposlili ili će u 2022. godini, u roku od 20 dana od dana objave Liste o odabiru korisnika zaposliti osobu koja pripada nekoj od ranjivih kategorija građana u smislu tačke I ovog Javnog poziva, u stalni radni odnos ili na određeno vrijeme, uz obavezu zadržavanja osobe u radnom odnosu u trajanju od najmanje dvanaest mjeseci od dana upošljavanja.

Aplikanti iz prethodnog stava će biti isključeni iz učešća u ovom Javnom pozivu odnosno iz daljeg postupka dodjeljivanja sredstava novčane podrške, ukoliko su u trenutku raspisivanja Javnog poziva:

- krivi za davanje lažnih informacija u prijavnom obrascu i/ili izjavi, koje su preduslov za učestvovanje u pozivu za novčanu podršku ili ako nisu dostavili potrebne informacije;
- ukoliko su u posljednjih šest mjeseci od raspisivanja javnog poziva otpuštali radnike, izuzev u slučaju smrti radnika, odlaska u penziju radnika, u slučaju otkaza radniku kao rezultat vođenja disciplinskog postupka ili sporazumnog raskida radnog odnosa,
- nisu uredno ispunili obaveze iz prethodno sklopljenih ugovora o odobravanju novčane podrške iz sredstava Budžeta Grada Tuzle,

Za dodjelu novčane podrške ne mogu aplicirati subjekti koji imaju status javne ustanove ili javnog preduzeća, neprofitne organizacije i privredni subjekti u vlasništvu bilo kojeg nivoa vlasti u BiH.

IV - Način prijavljivanja

Prijave na ovaj Javni poziv podnose se na propisanom prijavnom obrascu koji se može preuzeti sa službene internet stranice Grada Tuzle (<https://grad.tuzla.ba>) i u Centru za pružanje usluga građanima (Pisarnici Grada Tuzle).

Uz popunjen prijavni obrazac, aplikanti su obavezni dostaviti sljedeću dokumentaciju:

- dokaz o registraciji samostalne djelatnosti ili privrednog društva na području grada Tuzle (kopija rješenja Službe za ekonomski razvoj, poduzetništvo i poljoprivredu za samostalne djelatnosti a za privredna društva kopija rješenja o upisu u sudski registar),
- obavijest o razvrstavanju prema djelatnosti, izdatu od Zavoda za statistiku (kopija),
- dokaz o otvorenom računu u poslovnoj banci na koji će sredstva biti uplaćena (kopija),
- karton deponovanih potpisa osoba ovlaštenih za zastupanje (kopija),
- uvjerenje nadležne Porezne uprave Tuzla o izmirenim dospjelim poreznim obavezama kao i izmirenim obavezama po osnovu PIO/MIO, da nije starije od 30 dana od dana podnošenja prijave na ovaj Javni poziv (original ili ovjerena kopija),
- uvjerenje o urednom izmirenju indirektnih poreza, izdato od Uprave za indirektno oporezivanje, ukoliko je prijavljeni učesnik obveznik plaćanja PDV-a, a za prijavljene učesnike koji nisu u sistemu PDV-a dostavlja se uvjerenje Uprave za indirektno oporezivanje da nisu u sistemu PDV-a (uvjerenja ne mogu biti starija od 30 dana od dana podnošenja prijave na ovaj Javni poziv, a dostavljaju se u originalu ili ovjerenoj kopiji),
- dokaz da se osoba koju namjerava zaposliti u 2022. godini nalazi na evidenciji Biroa za zapošljavanje Tuzla, ili ukoliko se radi o osobi već zaposlenoj u toku 2022. godine, dokaz da je u momentu upošljavanja ta osoba bila na evidenciji Biroa za zapošljavanje Tuzla

(uvjerenje Biroa za zapošljavanje Tuzla da nije starije od 30 dana od dana podnošenja prijave na ovaj Javni poziv, original ili ovjerena kopija),

- lista osiguranih lica koja uključuje i odjavljena lica, izdata od Porezne uprave Tuzla, ne starija od 30 dana od dana podnošenja prijave na ovaj Javni poziv (original ili ovjerena kopija),
- kopiju ugovora o radu i prijavu Poreznoj upravi Tuzla ukoliko je u tekućoj 2022. godini već uposlio osobu koja pripada nekoj od ranjivih kategorija iz tačke I ovog Javnog poziva,
- izjava fizičkog lica, vlasnika samostalne djelatnosti, odnosno izjava odgovornog lica u pravnom licu, ovjerena u Centru za pružanje usluga građanima (Pisarnica Grada Tuzle) ili u nadležnom notarskom uredu, kojom će se potvrditi (Obrazac Izjave je u prilogu Prijavnog obrasca):
 - da nije osuđivan i da se ne vodi postupak po osnovu privrednog kriminala fizičkog lica-vlasnika samostalne djelatnosti, odnosno odgovornog lica u pravnom licu,
 - da u posljednjih šest mjeseci od raspisivanja javnog poziva nije otpuštao radnike, izuzev u slučaju smrti radnika, odlaska u penziju radnika, u slučaju otkaza radniku kao rezultat vođenja disciplinskog postupka ili sporazumnog raskida radnog odnosa,
 - da je broj zaposlenih osoba naveden u prijavnim obrascu u momentu prijave na javni poziv tačan,
 - da će u roku od 20 dana od dana objave Liste o odabiru korisnika zaposliti osobu koja pripada nekoj od ranjivih kategorija građana u smislu tačke I ovog Javnog poziva, u stalni radni odnos ili na određeno vrijeme,
 - da će kao poslodavac osobu za čije upošljavanje dobija novčanu podršku zadržati u radnom odnosu najmanje 12 mjeseci, o čemu će dostavljati odgovarajuće dokaze,
 - da će dodjeljena sredstva utrošiti za namjenu za koju će biti odobrena,
 - da je saglasan da u slučaju nepoštivanja odredbi ugovora o dodjeli sredstava, Pravilnika i programa utroška sredstava, u narednih pet godina neće moći sudjelovati u bilo kom programu podrške privrednim subjektima, koji se podržava iz budžeta Grada Tuzle.

Pored gore navedene dokumentacije, uz prijavni obrazac je potrebno dostaviti i dokaz da osoba koju je privredni subjekt uposlio u 2022. godini ili u 2022. godini namjerava uposliti nezaposlenu osobu iz Tuzle, pripada nekoj od ranjivih kategorija iz tačke I ovog Javnog poziva, zavisno od kategorije, tako da:

- za osobu sa invaliditetom u procentu 60% ili više, kao dokaz priložiti rješenje, ili nalaz i mišljenje nadležnog organa ili komisije koja utvrđuje invaliditet (kopija), ili
- za osobu koja je pripadnik manjinske grupe (Rom), kao dokaz priložiti ovjerenu izjavu te osobe o pripadnosti navedenoj manjinskoj grupi (original ili ovjerena kopija), ili
- za osobu stariju od 18 godina, koja je bila pod institucionalnom skrbi JU „Dom za djecu bez roditeljskog staranja“, ili SOS dječijeg sela, kao dokaz priložiti potvrdu JU „Dom za djecu bez roditeljskog staranja“ Tuzla ili uprave SOS sela, da se radi o njihovom štíćeniku (kopija), ili
- za žene žrtve nasilja u porodici, kao dokaz priložiti potvrdu JU Centar za socijalni rad Tuzla ili potvrdu UG Viva žene Tuzla (kopija), ili
- za mladu osobu dobi od 18 do 35 godina, kao dokaz priložiti rodni list (kopija), ili

- za osobu stariju od 55 godina, kao dokaz priložiti rodni list (kopija).

V- Provjera aplikacija (prijava)

Postupak dodjele sredstava za novčanu podršku putem ovog Javnog poziva provodi komisija za ocjenu prijava, koja će sukcesivno nakon objave javnog poziva vršiti ocjenu zaprimljenih prijava, te će po okončanju postupka ocjenjivanja sačiniti listu o odabiru korisnika. Lista o odabiru korisnika mora sadržavati subjekte koji su ispunili uslove javnog poziva sa predloženim iznosom sredstava, kao i subjekte koji nisu ispunili uslove javnog poziva sa naznakom koji uslov nije ispunjen.

Lista o odabiru korisnika se objavljuje na službenoj internet stranici Grada Tuzle (<https://grad.tuzla.ba>) i na oglasnoj ploči Grada Tuzle.

Komisija zadržava pravo da u postupku odlučivanja od aplikanata traži dodatna pojašnjenja u vezi aplikacije, kao i da izvrši kontrolu na licu mjesta.

Ukoliko ukupan iznos odobrene podrške putem ovog Javnog poziva bude veći od iznosa raspoloživih sredstava za raspodjelu, Komisija će izvršiti proporcionalno smanjenje predložene pojedinačne podrške po korisniku kako bi se uskladio iznos odobrene novčane podrške sa iznosom raspoloživih sredstava za raspodjelu.

Nakon okončanja postupka Komisija o svom radu sačinjava zapisnik koji zajedno sa listom o odabiru korisnika i prijedlogom iznosa novčane podrške dostavlja nadležnoj Službi za ekonomski razvoj, poduzetništvo i poljoprivredu, na osnovu čega se sačinjava i donosi program raspodjele sredstava.

Program raspodjele sredstava bit će objavljen na internet stranici Grada Tuzle (<https://grad.tuzla.ba>) i na oglasnoj ploči Grada Tuzle.

Detaljni uslovi korištenja dodijeljenih sredstava regulisat će se ugovorom koji se sklapa između Službe za ekonomski razvoj, poduzetništvo i poljoprivredu s jedne strane i korisnika sredstava s druge strane.

Korisnik dodijeljenih sredstava koji ima namjeru uposliti osobu koja pripada nekoj od ranjivih kategorija iz tačke I ovog Javnog poziva dužan je u roku od 20 dana od dana objave Liste o odabiru korisnika zaposliti osobu koja pripada nekoj od ranjivih kategorija, i za tu osobu dostaviti u Službu ugovor o radu u trajanju od najmanje 12 mjeseci i prijavu nadležnoj pozeznoj upravi, nakon čega će se pristupiti potpisivanju ugovora o korištenju odobrenih sredstava, i izvršiti transfer istih.

VI – Trajanje Javnog poziva i podnošenje aplikacija (prijava)

Ovaj Javni poziv je otvoren 21 dan od dana objave, a zadnji rok za predaju prijave je dana 19.9.2022. godine.

Prijave na ovaj Javni poziv sa pratećom dokumentacijom dostavljaju se u zatvorenoj koverti putem Centra za pružanje usluga građanima (Pisarnica Grada Tuzle) ili poštom na adresu:

GRAD TUZLA
Služba za ekonomski razvoj, poduzetništvo i poljoprivredu
Ul. ZAVNOBIH-a broj 11, 75000 Tuzla,

sa naznakom:
Prijava za učešće u JAVNOM POZIVU

**za dodjelu sredstava za podršku samostalnim djelatnostima i privrednim društvima
registrovanih na području grada Tuzle u zapošljavanju ranjivih kategorija u 2022. godini
-ne otvarati-**

Nepotpune i neblagovremene prijave neće se uzeti u razmatranje.

Sve dodatne informacije o načinu i postupku učešća u ovom Javnom pozivu, mogu se dobiti u Službi za ekonomski razvoj, poduzetništvo i poljoprivredu Grada Tuzle, putem telefona: 035/307-380, 307-385 i 307-387.